

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 20  
Oktubre 21, 2010  
www.philippinerevolution.net

*Editoryal*

## Ilantad at labanan ang panlilinlang at militarismo ng rehimeng Aquino

**K**ahit isang saglit mula nang maluklok ang bagong rehimen ni Benigno Aquino III, hindi naglubay ang Armed Forces of the Philippines (AFP) sa walang habas na kontra-rebolusyonaryong kampanyang militar nito laban sa mamamayang Pilipino. Na-is ng rehimeng US-Aquino na magamit ang natamo nitong pampulitikang puhunan mula sa nagdaang eleksyon para maka-kuha ng suporta sa isinasagawa nitong kampanya ng panunupil.

Subalit ito rin mismo ang mabilis ngayong lumulustay sa pampulitikang kapital ni Aquino. Ang mga nalinlang ng pangako ni Aquino na babaguhin ang dating kalakaran ay labis na nadidismaya sa pagpapatuloy ng madugong Oplan Bantay Laya (OBL) ng rehimeng US-Arroyo. Wala itong ipinagbago sa tindi at kalupitan ng walang habas na pasistang panunupil ng nagdaang rehimen.

Mahigit dalawang buwan nang tuluy-tuloy at todo-larga ang mga kampanyang militar ng AFP sa Ilocos-Cordillera, Bicol, Eastern Visayas at Negros at halos kabuuan ng


Mindanao. Umaabot sa pitong dibisyon ng Philippine Army ang nakatuon ngayon sa mga operasyong militar at naghahasik ng terorismo sa mamamayang nasasaklaw. Tuluy-tuloy din ang mga operasyong militar ng AFP sa iba pang rehiyon.

Bunga ng mga operasyong ito ang kaliwa't kanang kaso ng pasistang pandarahas at paglapastangan sa mga karapatan at pagyurak sa kabuhayan ng mamamayan. Tahasan ang paglapastangan ng AFP sa karapatang-tao at internasyunal na makataong batas.

Sa loob lamang ng mahigit dalawang buwan, tampok ang pagkakasangkot ng mga sundalo at mga operatiba nito sa mga kaso ng pagmasaker, pagdukot, pagtortyur, paninira ng pananim at kabuhayan, pangahalughog, pagnanakaw, sapilitang pagrerekut, pananakot sa mga sibilyan at marami pang iba. Mahigit isa kada linggo ang biktima ng ekstrahudisyal na pamamaslang sa ilalim ng bagong rehimen.

Ang ibayong pagbwelo ng kampanyang panunupil sa mga unang buwan ng bagong papet na rehimeng Aquino ay isinasagawa ng AFP sa tulak ng tatlong magkakaugnay na salik.

Ang una ay ang tuwirang utos ni Aquino at ng



***Mga tampok sa isyung ito...***

**Pamilya, minasaker sa Albay** PAHINA 3

**Mga manggagawa sa Agusan del Sur, nagwelga** PAHINA 5

**Malalang krisis sa kuryente sa Mindanao** PAHINA 7

mga upisyal ng AFP na lupigin ang armadong rebolusyonaryong paglaban ng mamamayan sa loob ng tatlong taon. Inilabas nila ang utos na ito matapos mabigo ang AFP na gapiin ang BHB sa ilalim ng isang dekada nang madugong OBL. Iniuutos ni Aquino ang pagpapalawig nito hanggang katapusan ng taon habang inihahanda ang bagong "internal security operational plan" para sa mga susunod na taon. Halos dinoble ni Aquino ang badyet ng AFP para sa susunod na taon, inianunsyo ang planong palakihin pa ito at nagkukumahog sa paglimos ng dagdag na ayudang militar mula sa kanyang imperyalistang amo.

Ikalawa, todo-buhos ngayon ang suporta ng US sa AFP at sa programang "counter-insurgency" ng papet na rehimeng Aquino. Pinagtibay kamakailan ng US ang pagbibigay sa rehimen ng \$434 milyong ayuda na magagamit sa mga programang nakaugnay sa digmang kontra-rebolusyonaryo, bukod pa sa ibinibigay nitong mga ayudang pampinansya at mga segunda-manong kagamitang militar para sa militar at pulis. Kasalukuyang inilulunsad sa linggong ito

ang 2010 Cooperation Afloat Readiness and Training (CARAT) sa iba't ibang bahagi ng Luzon na nilalahukan ng mahigit 4,000 sundalong Amerikano at 1,000 elemento ng Philippine Navy at Marines. Tuluy-tuloy ang pagdidikta at pakikialam ng US sa mga operasyong "counter-insurgency" ng AFP. Nasa likod ito ngayon ng pagbabalangkas ng bagong plano para sa darating na mga taon na nakatuon sa pagpapalakas ng saywar at mga gimik pampulitika upang mabigyang-katwiran at suhayan ang pag-iibayo ng kampanyang panunupil.

Ikatlo, ang kasalukuyang malalaking kampanyang militar ay mahigpit na nakaugnay sa mga partikular na proyekto ng malalaking dayuhang kapitalista at burgesyang komprador. Layunin ng mga kampanyang ito ang supilin ang paglaban ng mamamayan sa mga balak na simulan at palawaking operasyon ng malalaking minahan, mga kumpanyang agro-industriyal at iba pang mga proyektong mapandambong at mapaminsala sa mamamayan. Ang mga ito'y pawang sumasalanta sa kabuhayan, karapatan at iba pang interes ng ma-

mamayan.

Hindi mapagtatakan ng todo-todong pagsandig sa mga saywar na gimik at buladas ng rehimeng US-Aquino at ng AFP ang kalupitan ng pasismo nito. Sinusunod ngayon ng AFP ang mga tagubilin ng US Counterinsurgency Guide na higit na palakasin ang saywar at tipong "civil-military operations" (CMO). Kasabay ng mga operasyong militar, naglulunsad ang AFP ng mga palabas na *medical* at *dental mission*. Kasabay ng paghahasik ng terorismo, walang awat ang AFP sa pagsatsat ng "pagtataguyod sa karapatang-tao". Ginagamit nito ang masmidya para magpakalat ng pambabaluktot at paninira laban sa BHB at rebolusyonaryong kilusan.

Tuluy-tuloy ang hungkag na satsat ni Aquino at mga upisyal tungkol sa "kapayapaan" kahit wala itong mapagpasyang hakbangin pabor sa muling pakikipag-usap pangkapayapaan sa National Democratic Front of the Philippines (NDFP). Sa pagpapatuloy lamang ng dati nang mga patakarang sumasagka sa muling pagbubukas ng usapang pangkapayapaan, ipinakikita ni Aquino na wala siyang balak na lutasin ang mga ugat ng digmaang sibil sa bansa sa pamamagitan ng pampulitikang negosasyon.

Sa harap ng malawakang kampanyang panunupil at walang lubay na karahasan laban sa mamamayan, nalalantad ang militarista, reaksyunaryo at anti-mamamayang katangian sa likod ng mga mapagpanggap na pangakong pagbabago ng rehimeng US-Aquino. Kabilang dito ang "matuwid na daan" ni Aquino na sa katunaya'y balubaluktot na daang hinahawan ng pasismo at tinatanuran ng mga armadong pwersa nito para malayang makapandambong at makapang-api ang mga dayuhang monopolyong kapitalista at mga kasabwat nilang malalaking burgesyang komprador,



Taon XLI Blg. 20 Oktubre 21, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

## Nilalaman

### Editorial

Labanan ang militarismo ng rehimeng US-Aquino 1

### Pananalanta ng pasistang estado

Pamilya, minasaker sa Albay	3
Operasyon ng AFP sa Ilocos, bigo	4
Anti-terrorism law, ipinagpatuloy	4
Karapatan, dismayado kay Aquino	5
Lider manggagawa sa EV, laya na	5
Manggagawa sa Agusan, nagwelga	6
Piketlayn ng mga manggagawa ng ABSCBN	6
Rali ng KMU	6
Aksyong militar sa Panay	7
Aksyong militar sa Bikol	7
7 upisyal militar, pinaaresto	8
Mga drayber naglunsad ng piket	8
Pagmimina sa Cagayan Valley	9
Krisis sa kuryente sa Mindanao	10
Mga pangakong na trabaho ng rehimen	11
Pabahay sa US	12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

panginoong maylupa at bu-  
rukratang kapitalista.

Habang lalong pinatitindi  
at pinalalawak ni Aquino ang  
kampanyang panunupil at  
pagyurak sa mga karapatan ng  
mamamayan, lalong tumitindi  
ang galit at determinasyon ni-  
lang magtanggol at lumaban.

Dapat puspulang mailan-  
tad at labanan ang papatin-  
ding militarismo at pang-aapi  
sa mamamayan ng mapagkun-  
waring rehimeng US-Aquino.

Dapat magkaisa ang ma-  
mamayang Pilipino laban sa  
militaristang patakaran ng  
papet na rehimen na dikta ng  
US. Tuluy-tuloy na hubaran  
ang pagpapanggap at mga  
pangakong pagbabago ng re-  
himeng US-Aquino. Suporta-  
han ang malawakang pana-  
wagan na ituloy ang usapang  
pangkapayapaan upang hana-  
pan ng pangmatagalan at ma-  
katarungang solusyon ang  
digmaang sibil sa bansa.

Itaas ang tapang ng ma-  
mamayan upang labanan sa  
iba't ibang paraan ang panda-  
rahas at pananakot ng militar  
at mga armadong pwersa ng  
estado sa kanayunan at kalun-  
suran. Dapat malawakang ku-  
milos ang mamamayan at ipa-  
malas na hindi sila nalilintang  
o nadudurog ng rehimeng US-  
Aquino.

Dapat pag-ibayuhin ng  
BHB ang mga taktikal na  
opensiba upang biguin ang  
mga pasistang operasyong mi-  
litar at parusahan ang AFP at  
rehimeng Aquino sa mga kalu-  
pitan nito sa mamamayan. Ya-  
nigin ang rehimeng US-Aqui-  
no ng sunud-sunod at papala-  
king mga taktikal na opensi-  
ba. Ipamalas sa buong bansa  
ang patuloy na paglakas at  
pagsulong ng pambansa-de-  
mokratikong rebolusyon. **AB**

**ANG BAYAN** Oktubre 21, 2010

## Pamilya, minasaker sa Albay

**I**sang masaker sa Albay at laganap na mga paglabag sa karapatang-tao  
sa prubinsya ng Samar ang kabilang sa mga ulat na nakalap ng *Ang*  
*Bayan* nitong Oktubre.

**Oktubre 20.** Nasugatan sa paa  
ang isang 10-taong gulang na  
batang lalaki nang paulanan ng bala  
ng mga sundalo ng 49th IB ang ba-  
hay ng isang sibilyan sa Sta. Lour-  
dez, Barcelona, Sorsogon bandang  
alas-6:30 ng umaga.

**Oktubre 11.** Minasaker ng mga  
elemento ng 2nd IB ang isang pa-  
milya sa Barangay Nabas-an, Dara-  
ga, Albay, bandang alas-2 ng mada-  
ling araw. Namatay sa tama ng mga  
bala si Kagawad Wilfredo Lotino,  
asawa niyang si Evelyn at pamang-  
kin na si Anjo Martos. Nasugatan  
ang anak ng mga Lotino na si  
Jenny.

Natutulog ang mga bik-  
tima sa kanilang bahay  
nang pasukin sila ng mga  
sundalo at walang awang  
pagbabarilin. Ang pagma-  
saker ay ginawa ng mga  
sundalo ilang oras matapos  
salakayin ng BHB ang *tactical*  
*patrol base* ng 2nd IB sa Barangay  
San Ramon, Daraga.

**Setyembre.** Si Rosalie Gagbo, 30  
ay tinutukan ng baril at ilang beses  
hinampas ng kahoy sa leeg ng mga  
elemento ng 34th IB nitong Setyem-  
bre 20. Ginawa ito sa harap ng kan-  
yang tatlong maliliit na anak. Si  
Gagbo ay asawa ng isang kagawad  
ng barangay sa Baryo Casapa, Jia-  
bong, Samar. Pilit nilang pinaaamin  
si Gagbo na kasapi siya ng BHB at  
pinagbibigay ng impormasyon hing-  
gil sa base umano ng mga Pulang  
mandirigma. Pilit na pinapirma si  
Rosalie sa isang kasulatan na nagsa-  
saad na hindi siya sinaktan. Bago  
umalis ang mga militar ay tinangay  
pa nila ang manok at iba pang gamit

ng pamilya. Bumalik ang mga sunda-  
lo pagkalipas ng isang linggo at pi-  
napirma rin ang isang anak ni Rosa-  
lie na pitong taong gulang na nag-  
sasaad na hindi sinaktan ang ka-  
nyang ina.

Isang linggo makalipas ang  
pang-aabuso, nag-operasyon muli  
ang mahigit 20 tropa ng 34th IB sa  
Barangay Bunga, Motiong, Samar.  
Nangutang ang mga sundalo ng  
pagkain sa tindahan ng mag-asa-  
wang Irene at Serafin Pacios na nag-  
kakahalagang mahigit ₱4,000. Bago  
umalis, kumuha pa sila ng mga ga-  
mit na may halagang ₱2,200. Hindi

na masingil ng mag-asawa

ang utang dahil hindi nag-  
bigay ng pangalan ang  
mga sundalo at hindi sina-  
bi kung sino ang kanilang  
punong upisyal. Bago ito ay  
nangutang din ang nasabing  
yunit-militar sa tindahan ni  
Wenceslao Jomagdao sa parehong  
barangay at di rin nagbayad.

Ito ring yunit ng 34th IB ay nag-  
nakaw ng mga pananim ng mag-asa-  
wang Arcenia at Jose Labong sa Ba-  
rangay Bunga. Inapakan hanggang  
sa masira ang mga tanim nilang pa-  
lay. Inutang at di rin binayaran ang  
mga paninda nina Remedios at Ga-  
briel Pacleta.

Samantala, sa mga bayan ng Ma-  
tuguinao at San Jose de Buan, ma-  
lawakan ang pagkasira ng mga pana-  
nim na palay ng mga magsasaka rito  
dahil sa walang patumanggang pag-  
lapag ng mga helikopter sa kanilang  
palayan. Naghahatid noon ang heli-  
kopter ng suplay sa isinasagawang  
malawakang operasyong nagsimula  
noong Setyembre. **AB**





## Operasyon ng AFP sa Ilocos Sur, binigo

**B**inigo ng mga Pulang mandirigma sa ilalim ng Alfredo Cesar Comand (ACC) ng Bagong Hukbong Bayan (BHB) sa Ilocos Sur ang isang malawakang operasyong militar na nananalasa sa prubinsya mula pa noong Hunyo. Di bababa sa 500 sundalo mula sa 86th, 50th at 77th IB, Scout Rangers at CAFGU ang nag-operasyon.

Walang tinamong kaswalti ang BHB. Sa halip, dalawang sundalo ang napatay at di bababa sa tatlong elemento ng kaaway ang nasugatan sa sagupaan sa Barangay Sapang at Barangay Conconig East, Sta. Lucia noong Setyembre 10. Tinamaan din at bumagsak ang isang Huey *helicopter* na sumusuporta sa mga sundalo.

Ang nasabing operasyong militar ay nagbunsod ng mga paglabag sa karapatang-tao. Pinakamasahol dito ang pagdukot at pagsalbeyds sa mga sibilyang sina Nicolas Ramos ng Poblacion Norte, Salcedo noong Hulyo 28 at Elmer Valdez ng

Conconig East noong Setyembre 12.

Bruskong hinalughog ng mga pasistang tropa ang mga bahay ng mga residente at ninakaw ang kanilang mga gamit at produkto. Tinakot, dinahas, ginulo at pinagbantaan ang mga inabutang residente. Inobliga silang magbigay ng suplay gaya ng bigas at manok. Nagpakat din ang militar ng mga tsekpoynt sa iba't ibang lugar.

Nagpanggap ding mga gerilya ng BHB ang mga elemento ng 50th IB sa mga baryo ng Galimuyod, Candon, Sta. Lucia at Salcedo. Lagap ang kanilang pagnanakaw ng mga alagang hayop ng masa,

paglilimas sa kanilang mga palaisdaan, pangingikil, panghoholdap ng kahit mga naglalako ng pandesal at iba pang mga gawaing tulisan.

Ang mga tulisan at kriminal na gawaing ito ay tatak ng mga sundalo ng naghaharing uri, anang ACC. "Hinihikeyat namin ang masa at publiko na kilanlin nang mabuti ang mga nagpapanggap na kasapi ng BHB. Nagtitiwala kaming mapag-iiba nila ang gawi ng disiplinadong hukbo ng mahihirap na mamamayan at tulisang tropa ng AFP."

"Sa mahigit 30 taon nang pagkilos ng BHB sa Ilocos, ang kaysaysayan ang nagpapatunay na ang BHB ay isang rebolusyonaryong hukbo na disiplinado at totoong naninindigan at lumalaban para sa interes ng masang naghihirap at pinagsasamantalahan. Nakikita ang walang humpay na suporta at pagpapahalaga ng masa sa BHB kahit sa gitna ng hirap at labanan." **AB**

## Pagpapatuloy ng Anti-Terrorism Law, inalumahan

**D**ismayado sa Korte Suprema ang mga progresibong organisasyon matapos ibasura ang kanilang petisyon na kumukwestyon sa Republic Act (RA) 9372 o Human Security Act of 2007 (HSA). Pinahihintulutan ng naturang batas ang pag-aresto sa mga suspetsado nang walang mandamyo at pagdetine sa kanila kahit walang nakasampung mga kaso.

Sa 45-pahinang desisyon na inilabas sa pangunguna ni Associate Justice Conchita Carpio Morales, ibinasura ng Korte Suprema noong Oktubre 11 ang petisyon ng Bagong Alyansang Makabayan (BAYAN), Karapatan, Kilusang Mayo Uno, Integrated Bar of the Philippines, Southern Hemisphere Engagement Network Inc. at BAYAN-Southern Tagalog para ideklarang iligal ang mga isinampung kaso la-

ban sa mga aktibista sa ilalim ng HSA 2007.

Iginiit ng Karapatan ang kanilang pagtutol sa HSA 2007. Ayon kay Jigs Clamor, *deputy secretary general* ng Karapatan, magbibigay-daan ang pagpapatupad ng HSA 2007 sa higit na pang-aabuso ng mga elemento ng estado sa karapatang-tao. Mariing nilalabanan ng Karapatan at iba pang grupo ang pagsasabatas ng Anti-Ter-

rorism Law mula pa noong 2001.

Ayon naman kay Renato Reyes, pangkalahatang kalihim ng BAYAN, marami nang iligal na pang-aaresto, pagtortur, paniniktik at iba pang pang-aabuso ang naganap mula nang ipatupad ang batas noong 2007. Dagdag pa ni Reyes, ang kanilang paninindigan laban sa HSA 2007 ay hindi binago pagupo sa pwesto ni Benigno Aquino III. Umabot na sa 16 ang pinatay, dalawa ang dinukot at tatlo ang inaresto sa ilalim ng bagong rehimen.

Maging ang Catholic Bishops Conference of the Philippines (CBCP) ay tutol din sa nasabing batas. Anang CBCP, dadami ang magiging kalaban ni Aquino dahil sa naging desisyon ng Korte Suprema. **AB**



## Karapatan, nagpahayag ng pagkadismaya sa rehimeng Aquino

**N**agpahayag ng pagkadismaya ang Karapatan sa 100 araw na panunungkulan ni Benigno Aquino III. Ayon sa Karapatan, lalo pang dumadami ang mga biktima ng mga paglabag sa ilalim ng rehimen nito.

Kumpara sa 18 na pinaslang sa unang anim na buwan ng 2010 (mga huling buwan ng rehimeng Arroyo at ng OBL), umabot na sa 16 ang biktima ng ekstrahudisyal na pamamaslang sa unang 100 pa lamang ni Aquino. Garapalan ang mga paglabag, kagaya ng pwersahang pagpasok sa bahay, pagkaladkad sa biktima, pagtortur at pagpatay sa harap ng mga anak at kaanak.


Bigo ang pangako ni Aquino na lutasin ang isyu ng ekstrahudisyal na pamamaslang. Binuo niya ang Truth Commission subalit hindi naman pinasaklaw dito ang pag-resolba sa isyu ng karapatangtao. Patuloy naman na nakakulong ang Morong 43 at 338 pang detenidong pulitikal. Ipinagpatu-

loy naman niya ang Oplan Bantay Laya hanggang Disyembre 2010.

Wala pang aksyon ang rehimen para parusahan ang mga elemento ng estado na sangkot sa nasabing mga paglabag.

Samantala, tinuligsa rin ng Amnesty International (AI) ang kabiguan ng rehimeng Aquino na tugunan ang isyu ng karapatangtao sa Pilipinas sa loob ng unang 100 araw nito. Ito ay matapos magtungo ang mga ina ng dinukot na mga estudyanteng sina Karen Empeño at Sherlyn Cadapan sa

isang kumpe-



### Lider-manggagawa sa EV, pinalaya na

**N**akalaya na si Vincent "Bebot" Borja, 41 taong gulang at lider-manggagawa sa Eastern Visayas. Ito ay matapos ang tatlong taon niyang pagkakakulong dahil sa gawa-gawang kasong isinampa ng militar.

Napatunayang inosente sa pagpatay kay Marianito Calibo noong July 8, 2006 si Borja. Pinararatangan din siyang pumatay kina Junie Manigo at Simeon Cabonegro. Ipinagmayabang ng 19th IB na siyang umaresto at nagsampa ng kaso kay Borja na mayroon itong saksi na magdidiin kay Borja sa kasong pagpatay. Ngunit sa pagdinig noong Oktubre 13, nabigo ang saksi na tukuyin si Borja kaya agad siyang pinalaya.

Si Borja ay myembro ng pambansang konseho ng Kilusang Mayo Uno na kumakatawan sa Eastern Visayas. *Regional coordinator* din siya ng partidong Anakpawis at lider-manggagawa ng unyon sa Philippine National Oil Company sa Leyte na namuno sa matagumpay na welga noong 2004. Inaresto siya ng 19th IB noong Mayo 7, 2007 sa Malinao, Ormoc City sa kasagsagan ng kampanyang eleksyon.

AB

rensyang ng AI nitong Oktubre 8. Kasama nila roon ang biktima ng pagdukot at pagtortur na si Raymond Manalo. Isinalaysay nila sa mga delegado ang nangyari sa pagkawala nina Empeño at Cadapan, gayundin ang pagpapahirap kina Raymond at kanyang kapatid.

Kasabay nito, naglabas ng hatol ang United Nations Human Rights Council (UNHRC) na nagdidiin sa pananagutan ng AFP at reaksyunaryong gubyrerno kaugnay ng pagpatay ng mga pwersang militar kay Benjaline "Beng" Hernandez. Si Hernandez, deputy secretary-general ng Karapatan-Southern Mindanao ay pinaslang sa North Cotabato noong 2002. Ayon pa sa UNHRC, nilabag ng gubyrerno ng Pilipinas ang International Covenant on Civil and Political Rights.

Noong Oktubre 2008, hinatulan din ng UNHRC na maysala ang gubyrerno sa pagpatay kina Eden Marcellana at Eddie Gumanoy. Si Marcellana, pangkalahatang kalihim ng Karapatan-Southern Tagalog at Gumanoy, tagapangulo ng KASAMA-Timog Katalagulan ay pinaslang sa Oriental Mindoro noong 2003.

Samantala, tuluy-tuloy ang panawagan kay Aquino na palayain na ang mga detenidong pulitikal, partikular ang "Morong 43" na walong buwan na ngayong nakakulong. Ang pinakahuling sulat sa pangulo ay inilabas nitong Oktubre 18 bilang binayarang anunsyo sa *Philippine Daily Inquirer* (PDI). Pir-mado ito di lamang ng mahigit 100 propesor at mga samahan ng mga manggagawang pangkalusugan sa bansa kundi ng tatlong dating kalihim ng Department of Health—Dr. Esperanza Cabral (Arroyo), Dr. Jaime Galvez-Tan (Ramos) at Dr. Alberto Romualdez (Estrada). Bago ito, sinulatan din si Aquino ng Association of Democratic Lawyers na nakabase sa US.

AB

# Mga manggagawa sa Agusan del Sur, nagwelga

**N**agwelga ang mga manggagawa sa isang plantasyon ng *palm* sa Agusan del Sur bilang protesta sa hindi pagtugon ng kumpanya sa kanilang karaingan.

Nagbarikada ang mahigit 1,000 manggagawa sa paligid ng Filipinas Palm Oil Plantations Inc. (FPPI) sa Rosario, Agusan del Sur noong Oktubre 5. Inilunsad ang welga sa pamumuno ng Filipinas Palm Oil Plantations Inc. Workers Union (FPPI-WU). Naglunsad naman ng rali noong Oktubre 6 sa upisina ng FPPI sa Paseo de Roxas sa Makati City ang mga tagasuporta ng FPPIWU. Ang FPPIWU ay kaanib ng National Federation of Labor Unions (NAFLU-KMU).

Pangunahing hiling ng mga

manggagawa ang magkaroon ng aksyon matapos mabigo ang negosasyon sa pagitan ng unyon at kumpanya para sa Collective Bargaining Agreement (CBA). Humihiling sila ng dagdag na sahod at mga benepisyo. Iginigiit din nila ang regularisasyon ng mga manggagawang kontraktwal.

Hinihingi ng mga manggagawa ang dagdag na ₱130-150 sa kanilang arawang sahod. Subalit kakarampot na ₱4 kada araw lamang ang nais idagdag ng kumpanya. Ayaw ding ibigay ng kumpanya ang

25 iba pang mga benepisyo na kanilang hinihiling sa CBA noon pang Pebrero.

Ang FPPI, na pag-aari ng bilyunaryong si Dennis Villareal, ay itinatayo noong 1979. Mayroon itong 8,429 ektarya at siya ngayong pinakamalaking plantasyon ng *palm* sa Pilipinas. Ang lawak ng lupa ng FPPI ay bumubuo ng halos 30% ng mga plantasyon ng *palm* sa buong bansa.

Noong Oktubre 13, bunsod ng hiling ng kumpanya na matigil ang welga, pinwersa ng DOLE ang mga manggagawa na bumalik sa kanilang trabaho kahit hindi pa naibibigay ang kahit isa sa kanilang mga kahilingan. Nagpataw ng *assumption of jurisdiction* o inangkin ng DOLE ang kapangyarihang pagpas-yahan ang mga isyu sa pagitan ng kumpanya at mga manggagawa. **AB**

## Manggagawa ng ABS-CBN, nagtayo ng piketlayn

**N**agtayo ng piketlayn ang mga tinanggal na manggagawa sa ilalim ng Internal Job Market Workers Union (IJMWU) bilang tugon sa kawalang-aksyon ng gubyrerno sa tanggalan sa kumpanyang ABS-CBN.

Itinayo nila ang piketlayn sa tapat ng tarangkahan ng ABS-CBN sa Sgt. Esquerra St. sa Quezon City noong Oktubre 12. Nakiisa sa kanila ang mga manggagawa ng Kowloon House, mga kasapi ng Anakbayan, Kabataan Party at Bagong Alyansang Makabayan-National Capital Region.

Sinabi ni Alain Cadag, pangalawang tagapangulo ng IJMWU, na itinayo nila ang piketlayn upang igiit ang pagpapatupad ng desisyon ng Department of Labor and Employment (DOLE) noong Agosto na ibalik at kilalanin bilang mga regular na empleyado ng kumpanya ang 114 na manggagawang tinanggal. Iniutos din ng DOLE na maglunsad ng *certification election* para pormal nang kilalanin ang unyon.

Ilang pagkilos na ang pinamunuan ng IJMWU bilang protesta sa tumitinding tanggalan at pangwawasak sa unyon. Binatikos din nila ang rehimeng Aquino dahil sa kawalang-aksyon nito sa isyu ng kontraktwalisasyon sa hanay ng mga manggagawa sa ABS-CBN at iba pang mga kumpanya. **AB**

## KMU, nagrali laban sa taas-singil sa Philhealth

**N**agpiket sa labas ng upisina ng Philhealth sa Pasig City ang mga kasapi ng Kilusang Mayo Uno (KMU) noong Oktubre 12 bilang pagtutol sa implementasyon ng 200% pagtaas sa kontribusyon ng Philhealth para sa mga propesyunal at *self-employed* simula ngayong buwan.

Ayon sa KMU, aabot sa ₱600 kada kwarto ang dapat bayaran para sa taong ito. Magbabayad naman ng ₱900 kada kwarto para sa susunod na taon. Dati ay ₱300 kada kwarto ang kontribusyon sa Philhealth.

Hindi makatarungan ang taas singil ng Philhealth, ani Roger Soluta, pangkalahatang kalihim ng KMU. Habang pinagbabayad ang mga kasapi ng tatlong beses na mas mataas sa orihinal na kontribusyon, kinaltasan naman ng gubyrerno ang badyet ng Philhealth mula ₱5.17 bilyon ngayon tungong ₱3.5 bilyon sa 2011. Binawasan din ang badyet pangkalusugan mula ₱40 bilyon tungong ₱38 bilyon, dagdag pa ni Soluta. Iginigiit ng KMU na sa halip na ipapasan sa mga manggagawa ang mga kalitas na ito sa pamamagitan ng mas malalaking kontribusyon, dapat itaas ng gubyrerno ang badyet pangkalusugan. **AB**



## Mga aksyon ng BHB sa Bicol

**S**ampung elemento ng kaaway ang napatay at di bababa sa dalawa ang nasugatan sa siyam na naiulat na armadong aksyong inilunsad ng Bagong Hukbong Bayan (BHB) sa iba't ibang bahagi ng Bicol mula Oktubre 9 hanggang 18.

**Sa Masbate.** Inambus ng isang tim ng Jose Rapsing Command-BHB (JRC-BHB) nitong Oktubre 18 sa Barangay Buenasuerte, Pio V. Corpus ang dalawang pulis na aktibong naglalata ng lambat-paniktik. Ang mga napatay ay sina PO3 Nonilon Agbones at SPO1 Nilo Abejuela. Nakuha sa kanila ang isang kal .45 at isang 9 mm, mga magasin at mga bala.

Nauna rito ay dalawang sundalo ang kumpirmadong napatay at dalawa pa ang nasugatan nang paulanan ng bala ang kanilang sasakyan noong Oktubre 17 ng isa

pang tim ng JRC-BHB sa Barangay Maravilla, Palanas.

**Sa Sorsogon.** Apat na sundalo ng 49th IB sa pamumuno ng isang Lieutenant De Jesus ang kumpirmadong napatay at maraming iba pa ang nasugatan nang pasabugan ng BHB ang isang trak ng militar sa Sityo Cagdagat, Barangay Boton, Casiguran eksaktong alas-12:10 ng tanghali noong Oktubre 11. Nawasak ang trak na agad pinalibutan ng mga sundalo ng Philippine Army upang itago sa publiko ang kanilang mga kaswalti.

Noon ding umaga ng Oktubre

11, dalawang sundalo ang kumpirmadong napatay nang magkaka-sunod na ilunsad ng BHB ang mga operasyong sapper sa Marinas, Sorsogon City bandang alas-5:30, sa Barangay Cabigaan, Gubat noong alas-6:30 at sa Barangay Sangat, Gubat bandang alas-8.. Ang mga operasyong sapper ay tipo ng labanang gumagamit ng mga eksplosibo at isinasagawa sa likuran ng kaaway o sa malapitang kombatan para magbigay-suporta sa mga pangunahing aksyong militar.

**Sa Albay.** Tatlong operasyong harasment ang inilunsad ng mga Pulang mandirigma laban sa detatsment ng 2nd IB sa Barangay San Ramon, Daraga noong Oktubre 10 at sa isa pang detatsment sa Barangay Taplacon, Camalig. Bago ito, binulabog ng BHB ang tactical command post ng 2nd IB sa Barangay Cabran Pequeño, Camalig. **AB**

## Mga aksyong militar sa Panay

**A**nim na *shotgun*, isang pistolang 9 mm at mga kagamitang militar ang nasamsam ng Bagong Hukbong Bayan (BHB) sa Panay sa anim na aksyong militar mula Hunyo hanggang Agosto. Dalawa ring sundalo ang napatay at tatlo ang nasugatan, ayon sa isyung Setyembre 2010 ng *Daba-Daba*, ang rebolusyonaryong pahayagang masa sa Panay.

**Agosto 20.** Hinaras ng isang yunit ng Napoleon Tumagtag Command ng BHB-Southern Front ang detatsment ng 82nd IB at CAFGU sa Barangay Molina, Tubungan, Iloilo.

**Hulyo 30.** Nasamsam sa isang kapitan ng barangay sa Banate, Pontevedra, Capiz ang tatlong desabog, isang pistolang 9 mm at iba't ibang kalibre ng bala sa operasyong disarmang inilunsad ng Nonito Aguirre Sr. Command ng BHB sa Eastern Front. Dalawa sa mga nagrespondeng pulis ang nasugaan nang tambangan sila ng

mga gerilya. Sa hiwalay na insidente, matagumpay ding nagsagawa ng operasyong disarma ang isa pang yunit ng BHB at tatlong desabog ang nakumpiska nila.

**Hulyo 29.** Kinumando at hinaras ng isang yunit ng BHB ang natutulog na Reengineered Special Operations Team (RSOT) sa Barangay Bagacay, Igaras, Iloilo. Sa sobrang takot, walang direksyon ang mga ganting putok ng mga sundalo ng RSOT. Bunsod nito, tinamaan sa binti si Juanita Española, 40, isang sibilyang natutulog sa kanilang bahay sa kalapit na bara-

ngay ng Passi. Para mapagtakpan ang kanilang kahihiyan, kinunan nila ng litrato ang biktima at ibinalita ng RSOT na siya umano ay biktima ng istraping ng BHB.

**Hulyo 27.** Isang sundalo ang napatay nang bulabugin ng isang yunit ng BHB ang isa pang detatsment ng 82nd IB sa Barangay Osorio-I, San Remigio, Antique. Itinago ito ng militar sa publiko.

**Hulyo 13.** Isang sundalo ng 47th IB ang napatay nang biguin ng isang yunit ng BHB ang tangkang pagkubkob ng kaaway sa Barangay Ipil, Calinog, Iloilo.

**Hunyo 25.** Nasugatan ang isarhento na *commanding officer* ng detatsment ng 47th IB sa operasyong isnayping ng isang yunit ng Jose Percival Estocada Command ng BHB-Central Front sa Barangay Sto. Rosario, Jamindan, Capiz. **AB**

# 2 heneral, 5 koronel, ipinaaresto ng hukumang bayan sa Negros

**I**nilabas kamakailan ng hukumang bayan sa Negros ang mandamyento de aresto para sa dalawang heneral at limang koronel ng Armed Forces of the Philippines (AFP). Ang mandamyento ay kaugnay sa kanilang papel sa ekstrahudisyal na pagpaslang kay Benjamin Bayles noong Hunyo 14 at sa pagtindi ng mga paglabag sa karapatang-tao sa nasabing isla mula pa sa panahon ng rehimeng US-Arroyo. Si Bayles ay dating kasapi ng Bayan Muna sa Himamaylan City.

Ipinahayag nitong Oktubre 13 ni Kasamang Frank Fernandez, tagapagsalita ng National Democratic Front (NDF)-Negros na iniutos na sa lahat ng mga kumand sa operasyon at mga yunit ng Bagong Hukbong Bayan (BHB) ang pagaresto sa pitong upisyal-militar.

Ang tinukoy na matataas na upisyal-militar ay kasalukuyan at dating nasa ilalim ng 3rd Infantry Division ng Philippine Army (3rd ID) na may saklaw sa Panay, Negros at Guimaras. Sila ay sina Maj. Gen. Vicente Porto, Brig. Gen. Josue Gaverza, Col. Cesar Yano, Col. Maximo Caro, Col. Manuel L. Ochotorena, Lt. Col. Ricardo Bayhon at Lt. Col. Ramil Bitong.

Si Porto ay hepe ng 3rd ID-PA na nakabase sa Camp Macario Peralta, Jamindan, Capiz sa Panay. Si Gaverza ay dating hepe ng 303rd Brigade na nakabase sa Minoyan, Murcia, Negros Occidental at si Caro ang pumalit sa kanya. Si Yano naman ang dating namumuno ng 302nd Brigade. Pinalitan siya noong Hunyo ni Ochotorena. Si Bayhon ay *commanding officer* ng 61st IB at si Bitong ay sa 11th IB.

Inamin kamakailan nina Defense Secretary Voltaire Gazmin at AFP Chief of Staff Gen. Ricardo



David na ang dalawang pinaghihinalaan sa pagpaslang kay Bayles ay parehong sundalo. Gayunpaman, pinalalabas ng AFP na hindi iniutos sa dalawa ang pamamaslang. Nahu-li ng mga pulis ang dalawa sa isang tsekpoynt sa Silay City, Negros Occidental ilang oras makaraang paslangin si Bayles. Nasamsam sa kanila ang dalawang pistolang kal .45.

Ang dalawa, na nagpakilalang sina Roger Bahun, 26, at Ronnie Caurino, 24, ay nakakulong ngayon sa Silay City Jail, Silay, Negros Occidental at may nakasampung kasong kriminal sa Regional Trial Court. Ngunit noong Oktubre 9, nagbigay ng sertipikasyon si Col. Edilberto Surante, Adjutant General ng Philippine Army, na ang dalawa ay sa katunaya'y sina PFC Rafael Cordova at PFC Reygine Luas. Sila ay parehong nakatalaga sa 61st IB na pinamumunuan ni Lieutenant Colonel Bayhon. Bago ito, mariing itinanggi ng 3rd ID na mga sunda-lo nila ang dalawang ito. **AB**

## Mga drayber, naglunsad ng mga piket-rali

**NAGLUNSDAD** ng sabay-sabay na mga piket-rali noong Oktubre 13 ang mga progresibong drayber para igiit muli ang pagbabasura sa kautusan ng Department of Transportation and Communication (DOTC) na nagpapatong ng mas mataas na multa sa bawat paglabag sa trapiko ng mga tsuper. Tinutulan din nila ang nagpatuloy na pagtaas ng presyo ng langis.

Pinamunuan ng Pinagkaisang Samahan ng Tsuper at Operators Nationwide (PIS-TON) ang pambansang koordinadong kilos-protesta. Bandang alas-8 ng umaga, nagti-pon ang mga drayber sa Quezon City Memorial Circle bago magmartsa patungong sentral na upisina ng DOTC sa Ortigas, Mandaluyong City. Pagkatapos nito ay tumungo sila at nagdaos ng piket sa punong tanggapan ng Petron Oil Corp. sa loob ng San Miguel Complex sa Ortigas Center. Naglunsad din ng kilos-protesta ang mga drayber sa mga tanggapan ng Land Transportation Office sa Biñan, Laguna at sa mga syudad ng Legazpi, Iloilo, Roxas, Bacolod, Davao, Cagayan de Oro at General Santos.

Dismayado ang PISTON sa pagtanggihan ni Aquino na ibasura ang Oil Deregulation Law na siyang nagbibigay-laya sa mga kumpanya ng langis na walang pakundangang magtaas ng presyo. Anang PISTON, handa itong magsagawa ng malawakang tigil-pasada kapag nagpatuloy ang pagtaas ng presyo ng langis. **AB**



# Mapaminsalang pagmimina sa Hilagang Cagayan

**M**ay ilang taon nang umiiral ang mga operason ng mga dayuhang korporasyon sa pagmimina ang mga bayan sa Hilagang Cagayan. Saklaw nito ang mga lugar mula Aparri hanggang Lallo at mga bayan sa hilagang-kanluran ng prubinsya gaya ng Sanchez Mira at Pamplo-na.

Nakasentro ang pagmimina sa 16 na ektarya sa tabing ilog sa mga bayan ng Aparri, Camalaniugan at Lallo. Nakapangalan sa isang korporasyong Taiwanese at iba pang entidad ang mga proyekto pero iisa lamang ang sinasabing upisina ng mga ito. Ang totoo, mga lokal na burges kumprador ang pasimuno nito, sa pangunguna ng dinastiyang Enrile.

Pangunahing minimina sa rehiyon ang *magnetite* (batobalani). Nasa Cagayan ang pinakamaraming deposito nito sa buong bansa. Natural na natatagpuan sa mga

dagat at ilog ang *magnetite*. Ang mineral na ito na nakahalo sa buhangin ay nagsisilbing pabigat na pumipigil sa pagguho ng baybay o pampang. Animnapung porsyento (60%) ng buhangin mula sa mga lugar na nabanggit ay may *magnetite*.

Ang gubyrno mismo ang nagtulak ng malawakang pagmimina sa Cagayan. Noong 2006, nakipagkasundo ang gubyrno sa mga kumpanyang Taiwanese para sa Cagayan River Basin Flood Mitigation Project. Ang kapalit ng kontrata ay ang *magnetite* ng Ca-

gayan.

Dahil sa malawakang paghahakot ng buhangin, binabaha ngayon ang mga komunidad sa tabing-ilog tuwing umuulan. Gumuguho ang mga taniman at lumulubog ang maraming palayan. Kapag tag-init naman, mabilis na natutuyuan ang Apagonan River na kinukunan ng mamamayan ng kanilang kabuhayan.

Sa loob ng maraming dekada, ang ilog ang pinanggagalingan ng isda at *unnok* (kabibe) na ibinebenta nila roon. Nasira ang lahat ng ito nang dumating ang malalaking dayuhang korporasyon sa mina.

Simula pa lamang ng mga proyektong pagmimina, nagpaabot na ng pagkadismaya at pagtutol ang mga residente ng mga apektadong lugar. Limandaang magsasaka ang nagbarikada noong 2008 upang harangin ang proyekto pero sinupil sila ng mga pulis.

Noong 2007, tinangkang pasukin ng mga repormistang grupo gaya ng Akbayan ang mga apektadong lugar para kumbinsihin ang mga residente na makipag-areglo na lamang sa mga korporasyon at talikuran ang militanteng pagkilos.

Sa kasalukuyan, lahat ng malalaking ilog mula sa bayan ng Buguey hanggang Sta. Ana, Cagayan ay sinakop na ng *quarrying*, o pagmimina para sa bato at buhangin. Pangunahin itong magsisilbi sa pagtatayo ng Port Irene, mayor na bahagi ng Cagayan Economic Zone Authority na proyekto ng mga Enrile.

Lumalalim na ang mga ilog ng Mision, Baua, Palawig at Casambalangan na nagreresulta ng pagkasira ng patubig sa ekta-ekтарыang palayan. Nasisira na rin ang Wangag River na dating itinanghal bilang pinakamalinis na ilog sa buong bansa.

AB

## Lakbayan ng mga magsasaka, nagtagumpay

**M**atagumpay na nailunsad ng mga magsasaka ang kanilang pagkilos para igiit ang tunay na reporma sa lupa nitong Oktubre 18-21. Ang tinaguriang "Lakbayan ng Magsasaka at Anakpawis para sa Lupa at Hustisya" ay pinamunuan ng Kilusang Magbubukid ng Pilipinas (KMP) at mga kapatid na organisasyon.

Nagmartsa ang mga magsasaka mula sa Central Luzon at Southern Tagalog patungong Mendiola sa Maynila. Nagsimula ang kanilang martsa sa Hacienda Luisita sa Tarlac at Sta. Rosa sa Laguna. Nakiisa sa Lakbayan ang mga magsasakang galing sa Bicol, Cagayan Valley at Negros.

Nanawagan ang mga magsasaka na ibasura ang Comprehensive Agrarian Reform Program Extension with Reforms (CARPER) at ang Public-Private Partnership Program ng malalaking dayuhan sa bansa at itigil ang lumalalang ekstrahudisyal na pamamaslang sa hanay ng mga magsasaka at aktibista. Kinundena naman ng Katipunan ng Magsasaka sa Timog Katagalugan at Alyansa ng Magbubukid sa Gitnang Luzon ang tumitinding militarisasyon at planong Balikatan *exercises* sa Hacienda Luisita.

AB

# Malalang krisis sa kuryente sa Mindanao

**P**atuloy ang paglala ng ilang taon nang krisis sa kuryente sa Mindanao. Dinaranas ngayon sa halos buong isla ang hanggang tiglimang oras na *brownout* araw-araw na nagdudulot ng malaking perwisyo sa mamamayan.

Umaabot sa 300 hanggang 500 *megawatt* (MW) ang kakulangan sa suplay ng kuryente sa Mindanao. Bunga ito pangunahin ng pagbagsak ng kapasidad ng mga plantang *hydroelectric* na nagsusuplay ng kalakhan ng kuryente sa Mindanao. Lumilikha ng kuryente ang mga plantang ito mula sa buhos ng tubig sa dam. Malaki ang inihina ng agos ng mga pangunahing ilog dahil ang mga ito ay pinababaw na ng pagguho ng lupa at dumi mula sa kabundukang winasak ng pagtrotroso at pagmimina.

Bunga nito, umaabot na lamang sa 125 MW ang maksimum na kapasidad ng mga planta ng Agus na dating may kapasidad para sa 727 MW. Ang mga planta ng Pulangi naman ay nakapagluluwal na lamang ng 100 MW mula sa dating kapasidad nitong 255 MW. Karaniwa'y mga 10% na lamang nito ang aktwal na nailuluwal. May mga panahon pang umaabot na sa kritikal na lebel ang tubig sa mga dam kaya nanganganib na itigil ang operasyon ng mga ito.

Sa halip na lutasin ang pagbabaw ng mga lawa at ilog, nakipagkontrata ang gubyrno sa mga pribadong kumpanya sa industriya ng kuryente para punuan ang malaking kakulangan sa suplay ng kuryente.

Maanomalya ang mga kontratang ito at pabor sa interes ng mga IPP. Ang planta ng mga IPP ay karaniwang pinatatakbo ng inangkat na krudo o karbon (*coal*). Sa paghahabol ng malaking kita, kadala-sa'y ipinapasa lamang sa mga taga-konsumo ang malaking gastos sa di

episyanteng sistema ng produksyon ng kuryente.

Noong Pebrero, nakuha ng Aboitiz Power Corporation (APC) ang kontrata para masuplay ng pampuno sa malaking kakulangan ng kuryente sa Mindanao, pangunahin na sa timog at sa hilagang-silangan. Inaasahang makapagsusuplay ang APC ng karagdagang 200 MW ng kuryente.

Sa pamamagitan ng pag-aarin nitong Therma Marine Inc. (TMI) ay binili ng APC ang dalawang matagal nang nakatiwangwang na lumang *power barge* o PB ng NPC at pinaandar na lamang ang mga ito para magprodyus ng kuryente mula sa karbon. May tig-100 MW na kapasidad ang dalawang *power barge*. Binili ito ng APC sa halagang \$30 milyon (P1.4 bilyon) lamang, bagamat ang tinatayang aktwal na halaga ng mga iyon ay \$47 milyon (P1.5 bilyon).

Sandali lamang ay mababawi na ng APC ang ipinuhunan nito sa dalawang *power barge*, lalo't ang halaga ng kontrata nito sa NPC ay mahigit P1.58 bilyon kada taon.

Buong-buo itong kikitain ng TMI dahil ang sinisingil nito ngayon ay hindi lamang nakabatay sa aktwal na konsumo kundi ang buong kinontratang kapasidad (*ancillary charge*), makonsumo man ito o hindi. Sampung ulit na mas malaki na ang sinisingil ng TMI ngayong taon para sa *ancillary charge* kumpara noong nakaraang taon.

Bunga nito, mula sa P0.1830 kada kWh, ang singil sa kuryente sa isla ay sumirit sa P1.3209 kada kWh at umabot pa sa P1.4028 kada

kWh, o katumbas ng 622-667% pagtaas.

**Kontrol ng mga Aboitiz sa suplay ng kuryente.** Malawak at sumasaklaw sa buong bansa ang pamumuhunan at kontrol ng APC sa suplay ng kuryente. Sa kasalukuyan, nagmamay-ari ito ng 20 plantang *hydroelectric*; 13 plantang *thermal*, (kabilang ang dalawang *geothermal* at tatlong *coal-fired*); pitong pasilidad para sa distribusyon; at dalawang kumpanya sa serbisyong kuryente at *consultancy*. Karamihan sa mga ito ay nabili ng kumpanya sa gubyrno mula nang isabatas ang Electric Power Industry Reform Act (EPIRA).

Nakapaloob ang APC sa punong kumpanya ng angkang Aboitiz—ang Aboitiz Equity Ventures (AEV). Bukod sa negosyo sa kuryente na siyang pinakamalaking pinanggagalingan ng kita nito (56% ng kabuuang P8.3 bilyong netong kita noong 2009), may interes din ang AEV sa mga negosyo ng pagbabangko, pagkain, at transportasyon.

Malakas ang kuneksyon ng mga Aboitiz sa sunud-sunod na mga naghahari at ngayo'y may mahigpit na kuneksyon ito sa bagong rehimeng US-Aquino. Ang kasalukuyang kalihim ng Department of Energy na si Jose Rene Almendras ay dating naging ingat-yaman ng Aboitiz & Co. at Aboitiz Equity Ventures bago naglingkod sa mga Ayala.

Ang DOE ang nangangasiwa at kumokontrol sa lahat ng mga plano at proyekto na may kinalaman sa enerhiya sa buong bansa.

Bukod sa mga Aboitiz, Lopez at iba pang malalaking kumprador sa bansa na may malalaking negosyo sa pagsusuplay ng kuryente, inakit din ng papet na rehimen ang mga dayuhang kumpanya para mamuhunan sa pribatisasyon ng serbisyo sa kuryente sa bansa. **AB**

# Hungkag na mga bagong trabaho

**T**aliwas sa mga pangako ni Benigno Aquino III, walang ipinakikitang seryoso at makabuluhang hakbangin ang bagong rehimen tungo sa paglutas ng malaking problema ng disempleyo.

Walang maipamarali ang Department of Labor and Employment (DOLE) kundi ang “bagong trabahong” inaasahang malilikha bunga ng pagpasok ng mga bagong dayuhang pamumuhunan sa mga *export processing zone* (EPZ), *business processing outsourcing* (BPO), at iba pang katulad na gawaing serbisyo, gaya ng *customer service*, gawaing klerikal at pagmamaneho.

Napatunayan na sa nakaraan na walang makabuluhang ambag ang mga EPZ sa paglutas ng problema ng disempleyo. Sa ngayon, mahigit

lamang 600,000 ang direktang ini-employo ng mga dayuhang kumpanya sa mga EPZ. Ito ay 1.68% lamang ng 36.3 milyong Pilipinong nakatalang may empleyo. Hindi matutugunan ang malaking problema sa disempleyo, dumoble man ang dami ng mga EPZ.

Malala pa, nagaganap sa mga EPZ ang pinakamasasahol na anyo


ng pagsasamantala at pang-aapi laban sa mga manggagawa at paglabag sa karapatan sa pag-uunyon at iba pang karapatang-manggagawa. Malawakan ang kontraktwalisasyon.

Bukod pa, ang pamumuhunan at produksyon sa mga EPZ ay nakatuon lamang sa eksport (bahagyang pagpoproseso ng mga iniangkat na materyales para muling iluwas). Nakahiwalay ito sa kabuuan ng ekonomya ng Pilipinas at walang nababahaging tunay na makabuluhang bentahe sa pambansang ekonomya. Bag-

kus ay itinatali nito ang ekonomya sa malamanupaktura at sinasagkan ang pag-unlad ng tunay na pambansang industriya.

Ang bulto pa ng naidaragdag ngayong “bagong trabaho” ay nasa mga BPO. Walumpung porsyento (80%) nito ay sa mga *call center*. Umaabot sa 500,000 ang nagtatrabaho sa mga BPO sa Pilipinas.

Ipinapasa ng US at iba pang imperyalistang bansa ang ganitong mga trabaho pangunahin na sa mga atrasadong bansa kung saan mababa ang pasahod. Karamihan ng mga nagtatrabaho rito ay mga gradweyt o tumigil sa kolehiyo. Ang pagkabihasa nila sa Ingles ang pangunahing batayan ng pagkuha sa kanila at walang kinalaman sa kursong kanilang pinag-aralan. **AB**



## Ulat sa *hostage crisis*, pinalabnaw ni Aquino

**P**inalabnaw ni Pres. Benigno Aquino III ang ulat at mga rekomendasyon ng Incident Investigation and Review Committee (IIRC) na pinamunuan ni Justice Sec. Leila de Lima hinggil sa madugong pangho-*hostage* sa Luneta noong Agosto 23.

Sa partikular, ibinasura ni Aquino ang rekomendasyon na kasuhan ng kriminal na pagpapabaya ang pangunahing mga upisyal ng PNP at ilang matataas na upisyal ng gubyerno. Sa halip, inutos ni Aquino na ibaba sa mga kasong administratibo o mas magaan pa ang isasampa sa mga upisyal na nasangkot sa *hostage crisis*.

Iniligtas ni Aquino sa posibleng kasong kriminal ang mga malapit nitong kaibigan tulad nina Undersecretary Enrico E. Puno at Mayor Alfredo Lim ng Maynila. Bago ito, tumanggi si Aquino na isapubliko ang mga rekomendasyon at ang ilabas lamang ay ang unang bahagi ng ulat. Nabunyag lamang ang kabuuan nito nang kumalat ito sa *internet*.

Inulan ng mga batikos ang kawalang-kaseryosohan ni Aquino na papanagutin ang mga nagkasala at inutil niyang matataas na upisyal. Nagpahayag ng pagkadismaya maging ang mga upisyal ng Hongkong sa naging desisyon ni Aquino na balewalain ang mga rekomendasyon ng IIRC. **AB**



# Dumarami ang walang bahay sa US

**T**anda ng patuloy na pagkalugmok ng ekonomya ng US sa depresyon ang dumaraming mamamayang walang matirhan at naiilitan ng bahay. Batay sa ulat ng National Alliance to End Homelessness, tinatayang umaabot sa 3.5 milyong Amerikano ang nawawalan ng tirahan taun-taon. Umaabot din sa 670,000 katao ang walang mauwian tuwing gabi.

Karamihan sa kanila ay natutulog sa lansangan at mga parke. Ang iba ay tumitira sa kanilang sariling sasakyan at *mobile homes*. May ibang nakikitira sa mga kamag-anak o kaibigan, nagtatayo na lamang ng tolda sa mga pampublikong lugar o nakikisukob sa mga bahay-kupkupan na pinatatakbo ng gubyrno, simbahan o iba pang pribadong organisasyong pangkawanggawa.

Kabilang sa mga walang matirhan ang mga nagmula sa panggitnang uri tulad ng mga propesyunal na nawalan ng trabaho, maliliit na negosyanteng nabangkrap, mga beteranong sundalo sa Iraq at Afghanistan at mga karaniwang sundalo. Partikular sa mga beteranong sundalo, umaabot sa 400,000 ang walang tahanan bawat taon.

Umaabot naman sa walong milyon sa 90 milyong nagsanla ng bahay sa US ang hindi nakapaghulog ng bayarin noong Mayo. Aabot sa 1.2 milyong bahay ang maiilit ngayong 2010.

Lumalala ang karalitaang dinaranas ng mamamayang Amerikano. Isa sa bawat pitong Amerikano ang nabubuhay sa karalitaan noong 2009. Noong 2008-2009 ay umabot sa 43.6 milyon ang bilang ng mga maralita sa US matapos ito biglang madagdagan ng apat na milyon kataong nalugmok dahil sa resesyon. Tinatayang mahigit 40 milyong Amerikano ang nabubuhay ngayon sa rasyong pagkain mula sa gubyrno.

Sa kalagayang patuloy na lalaganap ang kawalan ng trabaho sa US, asahan na ibayo pang lalaganap ang karalitaan at kawalan ng tirahan. Naglaan ng \$1.2 bilyon ang administrasyong Obama sa mga programa para sa mga walang matirhan. Pero ito ay mumo lamang kung ikukumpara sa \$787 bilyong inilaan ng kanyang rehimen para isalba ang mga nangaluging malalaking bangko at kumpanyang pampinansya na sangkot sa maanomalyang susunsong pagpapautang para sa pabahay.

Samantala, nabunyang noong Se-


tyembre ang panibagong iskandalong kinasasangkutan ng mga bangko at kumpanya sa pinansya na nagpapautang para sa pabahay. Lumabas na niraratsada ng mga bangko ang pagpoproseso ng mga dokumento ng pagkaremata ng mga bahay na hindi nahuhulugan.

Nagiging kalakaran ng mga bangko na gumawa ng mga pekeng papeles para "makumpleto" ang mga kinakailangang dokumento sa pag-ilit para maibentang muli sa merkado ang mga kumpiskadong bahay.

Naobliga ang Ally Financial (dating GMAC Mortgage) na ihinto ang ginagawa nitong maanomalyang pag-iilit ng mga bahay matapos itong mabunyang sa sunud-sunod na imbestigasyong isinasagawa na sa buong US. Pag-aari ng gubyrno ng US ang 53.6% ng Ally Financial, isa sa pinakamalalaking kumpanyang sinalba ng gubyrno sa pagkakalugi sa pamamagitan ng \$17.2 bilyon pautang. Dahil sa gayunding pagkakalantad, naobliga na rin ang JP Morgan Chase, PNC Financial at Bank of America na itigil ang ginagawang pag-iilit. Kabilang din ang mga ito sa naluluging malalaking bangko at kumpanya sa pinansya na sinaklolohan ng gubyrno ng US.

Bunga nito, lumalakas ang panawagan ng mamamayan na magdeklara ng moratorium o pagtigil sa lahat ng pag-iilit. Sa kabila nito ay hindi pinirmahan ni Pres. Barack Obama ng US ang isang batas na ipinasa kamakailan ng Kongreso ng US na pumapabor sa mga iniilitan ng bahay na nais labanan sa korte ang pag-ilit. Nangangamba ang gubyrnong Obama na sa gayong batas ay babagal ang proseso ng pagbangon ng ekonomya ng US kundi man lalo pang mayayanig ang sistemang pampinansya ng bansa.

AB



**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLI Blg. 20  
Oktubre 21, 2010  
[www.philippinerevolution.net](http://www.philippinerevolution.net)

*Editoryal*

# Ilantad at labanan ang panlilinlang at militarismo ng rehimeng Aquino

**K**ahit isang saglit mula nang maluklok ang bagong rehimen ni Benigno Aquino III, hindi naglubay ang Armed Forces of the Philippines (AFP) sa walang habas na kontra-rebolusyonaryong kampanyang militar nito laban sa mamamayang Pilipino. Na-is ng rehimeng US-Aquino na magamit ang natamo nitong pampulitikang puhunan mula sa nagdaang eleksyon para maka-kuha ng suporta sa isinasagawa nitong kampanya ng panunupil.

Subalit ito rin mismo ang mabilis ngayong lumulustay sa pampulitikang kapital ni Aquino. Ang mga nalinlang ng pangako ni Aquino na babaguhin ang dating kalakaran ay labis na nadidismaya sa pagpapatuloy ng madugong Oplan Bantay Laya (OBL) ng rehimeng US-Arroyo. Wala itong ipinagbago sa tindi at kalupitan ng walang habas na pasistang panunupil ng nagdaang rehimen.

Mahigit dalawang buwan nang tuluy-tuloy at todo-larga ang mga kampanyang militar ng AFP sa Ilocos-Cordillera, Bicol, Eastern Visayas at Negros at halos kabuuan ng


Mindanao. Umaabot sa pitong dibisyon ng Philippine Army ang nakatuon ngayon sa mga operasyong militar at naghahasik ng terorismo sa mamamayang nasasaklaw. Tuluy-tuloy din ang mga operasyong militar ng AFP sa iba pang rehiyon.

Bunga ng mga operasyong ito ang kaliwa't kanang kaso ng pasistang pandarahas at paglapastangan sa mga karapatan at pagyurak sa kabuhayan ng mamamayan. Tahasan ang paglapastangan ng AFP sa karapatang-tao at internasyunal na makataong batas.

Sa loob lamang ng mahigit dalawang buwan, tampok ang pagkakasangkot ng mga sundalo at mga operatiba nito sa mga kaso ng pagmasaker, pagdukot, pagtortyur, paninira ng pananim at kabuhayan, pangahalughog, pagnanakaw, sapilitang pagrerekut, pananakot sa mga sibilyan at marami pang iba. Mahigit isa kada linggo ang biktima ng ekstrahudisyal na pamamaslang sa ilalim ng bagong rehimen.

Ang ibayong pagbwelo ng kampanyang panunupil sa mga unang buwan ng bagong papet na rehimen ng Aquino ay isinasagawa ng AFP sa tulak ng tatlong magkakaugnay na salik.

Ang una ay ang tuwirang utos ni Aquino at ng



***Mga tampok sa isyung ito...***

**Pamilya, minasaker sa Albay** PAHINA 3

**Mga manggagawa sa Agusan del Sur, nagwelga** PAHINA 5

**Malalang krisis sa kuryente sa Mindanao** PAHINA 7

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa [angbayan@yahoo.com](mailto:angbayan@yahoo.com)